

АКАФИСТ ПРЕСВЯТОЙ БОГОРОДИЦЕ ПЕРЕД ЕЯ ИКОНОЙ, ИМЕНУЕМОЙ «ВСЕЦАРИЦА»

Кондак 1

Новоявленной Твоей иконе предстояще вернии умильно, воспеваям Ти, Всецарице, раби Твои; ниспосли цельбы к Тебе притекающим ныне рабом Твоим, да вси радостно зовем Ти: Радуйся, Всецарице, недуги наша благодатию исцеляющая.

Икос 1

Ангел предстатель с небесе сшед, рече Всецарице: радуйся! И боговещанным гласом воплощаема Тя зря, Господи, возопи к Ней таковая:

Радуйся, Главизно нашего спасения;

радуйся. Исполнение Зиждителя смотра.

Радуйся, яко Тобою Бог воплотися;

радуйся, яко Невидимый в Тебе изобразися.

Радуйся, Милость мира внутрь приявшая;

радуйся, одеяние плоти Слову соткавшая.

Радуйся, уму непостижная Горняя Славо;

радуйся, сердца оживившая Небесная Манно.

Радуйся, Звездо, благодати сияние;

радуйся, Источнице, живыя воды излиание.

Радуйся, Богородице, в женах благословенная;

радуйся, рождшая Спаса, Дево нетленная.

Радуйся, Всецарице, недуги наша благодатию исцеляющая.

Кондак 2

Безначальное Слово Отроча младо Тобою бысть, исцеления подая Тя, Дево, чтущим и неизреченное Его Рождество воспевающим: Аллилуиа.

Икос 2

Разум недоразумеваемый разумети Дева ищущи, возопи к служащему: яко Отроковица чистая, како буду Вышняго Мати, изъясни; к Ней же Гавриил рече со страхом, зовый таковая:

Радуйся, Совета Вышняго Избраннице;

радуйся, гласа молящихся Скоропослушнице.

Радуйся, Сокровище Христова мира;

радуйся, людей Твоих Надеждо и Сило.

Радуйся, раковые язвы дивная Губительнице;

радуйся, прочих болезней Исцелительнице.

Радуйся, единое миру Заступление;

радуйся, верное в скорбех Избавление.

Радуйся, плач и слезы присно утоляющая;

радуйся, спасения входы всем отверзающая.
Радуйся, Скиптре и Державо Афон населяющих;
радуйся, Жезле монахов и мирян.
Радуйся, Всецарице, недуги наша благодатию исцеляющая.

Кондак 3

Сила Вышняго осенивши Тя, Отроковице, плоть прият неизреченно, показа Тя Село сладкое, хотящим жати спасение и поющим: Аллилуиа.

Икос 3

Прославися дивно святая икона Твоя, Всецарица именуемая, егда цельбоносно явися Богоматере изображение; вопиющим же пред нею с верою исцеления подаеши, да умножаются песни сицевыя:

Радуйся, Мати незаходимаго Света;
радуйся, претерпевших до конца Победо.
Радуйся, в болезнех и скорбех сущим Врачевание;
радуйся, сирот и вдовиц нерушимая Стено.
Радуйся, двери райские отверзающая;
радуйся, труждающихся и обремененных заступающая.
Радуйся, о спасении верных Ходатаице;
радуйся, за род человеческий Молитвеннице.
Радуйся, Лестнице небесная, возводящая от земли к небеси;
радуйся, Водо живая, омывающая смертныя грехи.
Радуйся, Агнице, сердца незлобивых хранящая;
радуйся, Покрове, чад Церкви осеняющий.
Радуйся, Всецарице, недуги наша благодатию исцеляющая.

Кондак 4

Живот мирови даруя, Владыка мира вселйся во утробу Твою неискусомужно; Матерь верных Тя показав, в мире тех воспевати призва: Аллилуиа.

Икос 4

Преславная содеяшася о Тебе, Граде Божий, исцелением бывающим от святыя иконы Твоя; цельбоносные струи врачеваний приемлюще, благодарственно, о Всецарице, вопием:

Радуйся, Снадобие, боль утоляющее;
радуйся, Прохладо, жар недужных остужающая.
Радуйся, прижигающая раковыя язвы, аки пламенем;
радуйся, подымающая со одра оставленных врачми.
Радуйся, лик Свой пречистый избранным являющая;
радуйся, от греховных уз разрешающая.
Радуйся, яко Тобою избавление от смерти даровася;

радуйся, яко Тобою безсчетный сонм верных оправдася.
Радуйся, Высото, человеческими помыслы неизследованная;
радуйся, Глубино, единым Словом изведенная.
Радуйся, Пророчестве прежде Тебе бывших патриархов;
радуйся, Наставнице Тебе молившихся иерархов.
Радуйся, Всецарице, недуги наша благодатию исцеляющая.

Кондак 5

Пречистый Храм Спасов познахом Тя, Отроковице; к Тебе припадаем, Чистая, да нас соделаеши храмы Божества, вопиющих Ему: Аллилуиа.

Икос 5

Видеша чини ангельстии на руку Твоею Создавашаго рукою человеки, и яко Владычицу разумевающе Тя едину, аще и Рабою Себе нарекла еси, потщася песньми послужити Ти, Благословенней, сицевыми:

Радуйся, Богом поставленная превыше Небесных Сил;
радуйся, чудесными исцеленьми исполняющая мир.
Радуйся, хвалу и славу от небес слышашая;
радуйся, благодарение от земли приемлющая.
Радуйся, яко семя тли в сердцах потребила еси;
радуйся, яко козней диавольских ярем сокрушила еси.
Радуйся, юдоль плачевную исполнившая радостью;
радуйся, скорби изменяющая в небесную сладость.
Радуйся, Благоухание Богу приятное;
радуйся, кающихся грешников Веселие изрядное.
Радуйся, Броне правды от искушений;
радуйся, Щите ограждения от вражды и нестроений.
Радуйся, Всецарице, недуги наша благодатию исцеляющая.

Кондак 6

Проповедницы богоглаголивии, Спасовы ученицы, предсташа Ти, Дево, чудно, внегда от земли к небеси восходила еси, да единым сердцем и усты воспоят Богови: Аллилуиа.

Икос 6

Возсия дивная благодать от иконы Твоя, Всецарице, егда юноша, ученьми сатанинскими омраченный, пред нею паде и недвижим бысть; паче чаяния же от уз мрачных свободенный, со страхом и радостью взываше Ти сице:

Радуйся, Исправление нечестиваго жития;
радуйся, Утешение страждущих люте.
Радуйся, бесовских полчищ от Церкви Отгнание;
радуйся, мглы греховной Разсеяние.

Радуйся, козней невидимых Упразднение;
радуйся, демонских чар всемошное Одоление.
Радуйся, Светильнице, прельщенных наставляяй;
радуйся, Облаче, невинных от зла покрываяй.
Радуйся, Холме, небесною манною питающий;
радуйся, Долино, смирением Христовым насыщающая.
Радуйся, Каменю Небеснаго Царствия;
радуйся, Зерцало превечнаго Света.
Радуйся, Всецарице, недуги наша благодатию исцеляющая.

Кондак 7

Хотящу дати Себе в снедь верным, благоволил еси от Девы воплотитися, да приемлюще Пречистое Тело и Кровь Твою, познают Тя, Бога совершеннаго; тем же дивящися неизреченней премудрости сей зовем: Аллилуиа.

Икос 7

Новое показа таинство явлься Зиждитель, со ученики свершивый Тайную Свою Вечерю; мы же моляще Всецарицу удостоити нас Божественныя Святыни, восписуем Ей сицевая:

Радуйся, Подательнице Небеснаго Хлеба;
радуйся, Родительнице Вечнаго Живота.
Радуйся, Чаше, Христу приобщающая;
радуйся, душу и тело с Богом сочетающая.
Радуйся, Лжице золотая, исполнь Божественных Тайн;
радуйся, драгий Кивоте, вместилище великия Святыни.
Радуйся, Персте, на святую Евхаристию указуяй;
радуйся, Трапезо, предлагающая нам Пищу Святую.
Радуйся, достойных причастников одесную поставляющая;
радуйся, ревнителей Божественныя Литургии от ада избавляющая.
Радуйся, приводящая смертных к Источнику безсмертия;
радуйся, ограждающая чад Своих миром и крепостию.
Радуйся, Всецарице, недуги наша благодатию исцеляющая.

Кондак 8

Странное Рождество видевши, житейское всякое отложше попе-чение, горе имеим сердца; на сие бо Вышний явися во еже привлещи Тому вопиущия: Аллилуиа.

Икос 8

Неотступно в недрах Отеческих пребывая, Слово неописанное на земли плоть бысть; Бог Велий сотвори величие Деве и призре на смирение Рабы Своея, слышавшия сицевая:
Радуйся, Невместимаго Бога вместившая;
радуйся, надмирнаго Творца миру явившая.

Радуйся, яко сокрушился смерти держава;
радуйся, яко исцелился Адамова рана.
Радуйся, Пластырю, струпы душевныя заживляяй;
радуйся. Елее, язвы телесныя умащаяй.
Радуйся, Утоление болезней рождающих;
радуйся, Облегчение мук умирающих.
Радуйся, нанесшая поражение аду;
радуйся, притупившая смерти жало.
Радуйся, Чаение всеобщаго воскресения;
радуйся, православных несумненное Спасение.
Радуйся, Всецарице, недуги наша благодатию исцеляющая.

Кондак 9

Всякое естество ангельское и человеческое удивися величию непо-стижимаго Твоего воплощения, Слове; недоумевающе же о сей велией тайне благочестия, со страхом и трепетом благодарственно зовем Ти: Аллилуиа.

Икос 9

Многоразличными недуги одержимии, о Всецарице, от святых иконы Твоя паче чаяния исцеления получают, да приемше верою благодать, велегласно зывают Ти:

Радуйся, здравых чад присное Сохранение;
радуйся, болящих ко здравию Преложение.
Радуйся, детей недугующих Исцеление;
радуйся, юных страдальцев Мати.
Радуйся, Возстание на одр болезни поверженных;
радуйся, Отрадо страхом смертным одержимых.
Радуйся, яко внимлеши человеков рыданиям;
радуйся, призревающи на наша стенания.
Радуйся, более земных небесною радостию Растворение;
радуйся, люте обуреваемых пачеестественное Терпение.
Радуйся, яко уготовляеши плачущим радость;
радуйся, яко снабдеваеши кротких крилома молитвы.
Радуйся, Всецарице, недуги наша благодатию исцеляющая.

Кондак 10

Спасти хотя Зиждитель истлевшее грехом человеческое естество, сниде на Тя, яко дождь на руно, и купину Тя соделав неопалимую, Бог сый бысть человек, да воспевает Ему: Аллилуиа.

Икос 10

Стена еси девам. Отроковице чистая, и всем о чистоте радящим; в Тя бо вселися Бог, очищаяй разумные создания Своя, да избывше всякия скверны, предлагаем Ти сицевая:

Радуйся, молчания взыскующих Собеседнице;
радуйся, Венче хранящих девство.
Радуйся, Начало и Конец духовного совершеня;
радуйся, Хранилище Божественного откровения.
Радуйся, Троического Совета Таиннице;
радуйся, спасения человеков Виновнице.
Радуйся, Вершино, гордым умам неприступная;
радуйся, Убежище, смиренным сердцам доступное.
Радуйся, Чистая, небесе чистейшая;
радуйся, Херувимов и Серафимов Честнейшая.
Радуйся, Обрадованная, яко прияла еси от Архангела радование;
радуйся, Утешенная, яко рuce Твои осязате воскресшаго Христа.
Радуйся, Всецарице, недуги наша благодатию исцеляющая.

Кондак 11

Пение тщася разумное Спасу приносить, всегда неключими, Владычице, остаемся раби Твои;
кто бо может достойно воспети Бога, Егоже имя яко миро излианное; сего ради вопием Ему:
Аллилуиа.

Икос 11

Свет велий возсияв во тьме сидящим, посети нас, о Дево, Восток свыше, Сын и Бог Твой; Ты
соделав свещею на свещнице, светоносным чадом церковным наказует приносить Ти сицевая:
Радуйся, Заре, умнаго Солнца;
радуйся, Вместителище Божественного Огня.
Радуйся, Свете, яко одеяние святых соткала еси;
радуйся, Свеще, яко тьму бесовскую отгнала еси.
Радуйся, косных умов Просвещение;
радуйся, грешных сердец Озарение.
Радуйся, Деснице, из моря суетствий изводящая;
радуйся, Луче, путеводяй к Царствию спасающихся.
Радуйся, Молние, нераскаянных поражающая;
радуйся, Громе, губителей устрашающий.
Радуйся, лукавыя совести Просветление;
радуйся, Умилостивление Божия Суда.
Радуйся, Всецарице, недуги наша благодатию исцеляющая.

Кондак 12

Благодать дати восхотев, Завета Ветхаго Податель Завет Новый нам дарова; мы же благодать
приимше, не дела закона, но единою верою спасение улучивше, восписуем вси: Аллилуиа.

Икос 12

Поюще Твое рождество, якоже древле Израиль в кимвалех сеновную скинию воспеваше, тако мы ныне Тя, Скинию истинну, добродетельми прославляем, да слышиши всех сицевая:

Радуйся, Песне воспеваемая горе;

радуйся. Псалме, слышимый низу.

Радуйся, Единому Богу достойно послужившая;

радуйся, Божественней Троице смирением угодившая.

Радуйся, веки Носящаго носившая в Себе; радуйся, Престоле Содержащаго вселенную в руке.

Радуйся, Тайно неизреченная веков и времен;

радуйся, Упование твердое народов и племен.

Радуйся, сердечное Радование иереев благоговейных;

радуйся, быстрое Слышание молитв церковных и келейных.

Радуйся, Премудрости ДOME богозданный;

радуйся. Милости Сосуде, Богом избранный.

Радуйся, Всецарице, недуги наша благодатию исцеляющая.

Кондак 13

О Всецарице Мати, рождшая всех святых Святейшее Слово, нынешнее наше приявши песнопение, от всякой смертныя болезни исцели ны и будущего избави осуждения вопиющих: Аллилуиа.

(Этот кондак читается трижды, затем икос 1 и кондак 1)

Молитва первая

О Всеблагая, досточудная Богородице, Пантанасса, Всецарице! Несмы достоин да внидеши под кров мой! Но яко милостиваго Бога любоблагоутробная Мати, рцы слово, да исцелится душа моя и укрепится немощствующее тело мое. Имаши бо державу непобедимую и не изнеможет у Тебе всяк глагол, о Всецарице! Ты за мя упроси. Ты за мя умоли. Да прославляю преславное имя Твое всегда, ныне и в безконечныя веки. Аминь.

Молитва вторая

О Пречистая Богомати, Всецарице! Услыши многоболезненное воздыхание наше пред чудотворною иконою Твоею, из удела Афонскаго в Россию принесенною, призри на чад Твоих, неисцельными недуги страждущих, ко святому образу Твоему с верою припадающих! Якоже птица крилома покрывает птенцы своя, тако и Ты ныне, присно жива сущи, покрый нас многоцелебным Твоим омофором. Терпением и Ослабою явися. Тамо, идеже надежда

исчезает, несумненной Надеждою буди. Тамо, идеже лютые скорби превознемогают, тамо, идеже мрак отчаяния в души вселися, да возсияет неизреченный свет Божества! Малодушных утеши, немощныя укрепи, ожесточенным сердцам умягчение и просвещение даруй. Исцели болящия люди Твоя, о Всемилостивая Царице! Ум и руки врачующих нас благослови, да послужат орудием Всемощнаго Врача Христа Спаса нашего. Яко живей Ти, сущей с нами, молимся пред иконою Твоею, о Владычице! Простри руке Твои, исполненныя исцеления и врачбы, Радосте скорбящих, в печалех Утешение, да чудотворную помощь скоро получив, прославляем Живоначальную Нераздельную Троицу, Отца, Сына, и Святаго Духа во веки веков. Аминь.